

# **Utkast til forskrift om auke av maksimalt tillaten biomasse for løyve til akvakultur med laks, aure og regnbogeaure**

**Heimel:** Fastsett av Nærings- og fiskeridepartementet xxx med heimel i lov 17. juni 2005 nr. 79 om akvakultur (akvakulturloven) § 5, § 6, § 7, § 9, § 26, § 28, § 29a, § 30, § 31a, § 33a og lov 19. desember 2003 om matproduksjon og mattrygghet § 7, § 14, § 15, § 19 og § 26, jf. delegasjonsvedtak 19. desember 2003 nr. 1790.

## **§ 1. Formål**

Formålet med denne forskrifta er å gjennomføre ein kapasitetsauke for løyve til matfisk av laks, aure og regnbogeaure.

## **§ 2. Verkeområde**

Forskrifta gjeld høve til å auke maksimalt tillaten biomasse for løyve til matfisk av laks, aure og regnbogeaure i sjøvatn med 5 % av den maksimalt tillatne biomassen mot vederlag. Høve til auke gjeld ikkje løyve til matfisk av laks, aure og regnbogeaure i sjøvatn til særlege formål, jf. kap. 5 i forskrift 22. desember 2004 nr. 1798 om tillatelse til akvakultur av laks, ørret og regnbueørret.

## **§ 3. Kunngjering av tilbod**

Tilbodet skal offentliggjeras på fylkeskommunane og Fiskeridirektoratet sine nettsider minimum to månader før fristen går ut.

Fylkeskommunane skal også seinast ein månad før fristen går ut kunngjere tilbodet i brev til innehavarar av akvakulturløyve som står i akvakulturregisteret på det tidspunktet.

Kunngjeringa og brevet skal minimum innehalde følgjande:

- a) Krav til meldinga og frist for innsending.
- b) Informasjon om vederlag og innbetaling av dette.
- c) Informasjon om vilkår for utviding av løyve.

## **§ 4. Melding**

Innehavar av løyve til matfisk av laks, aure og regnbogeaure i sjøvatn skal etter § 6 sende melding til fylkeskommunen i det fylket løyvet høyrer heime dersom han ønskjer å utvide løyvet.

Det skal ikkje betalast søknadsgebyr for melding etter denne forskrifta.

## **§ 5. Vederlag**

For utviding etter denne forskrifta skal det betalast vederlag til staten:

- a) For løyve i Troms og Finnmark som er avgrensa til 945 tonn er vederlaget 1 500 000 kroner.
- b) For løyve i resten av landet, som er avgrensa til 780 tonn, er vederlaget 1 500 000 kroner.
- c) For løyve med anna avgrensing enn nemnd i bokstav a og b, er vederlaget 38 461,50 kroner per tonn løyvet blir utvida med.

Vederlaget skal betalast til Fiskeridirektorat, Økonomiseksjonen, Postboks 185 Sentrum, 5804 Bergen, kontonummer 7694 05 09048, og vere merka «Vederlag 2015 - [nummer på løyve]». Frist for innbetaling er den same som for innsending av melding etter § 6.

Vederlaget blir ikkje refundert ved eventuell seinare inndraging av akvakulturløyvet på bakgrunn av forhold nemnde i akvakulturloven § 9.

## **§ 6. Krav til sending og melding**

Meldinga skal sendast seinast 18. mars 2015. Det er tillate å sende meldinga med rekommandert brev, per faks eller elektronisk. Oppmøte hos den einskilde fylkeskommune, enten personleg eller med sendemann, er også tillate. Ved oppmøte skal meldinga vere mottatt innan 18. mars 2015 kl. 1500.

Meldinga skal merkast med: «Melding om kapasitetsauke 20xx».

Meldinga skal førast på fastsette skjema og minimum innehalde:

- a) Kva løyve meldinga gjeld.
- b) Kvittering på at vederlaget er betalt til Fiskeridirektoratet sin konto, jamfør § 5. Jamstilt med kvittering er utskrift frå nettbank som viser at vederlaget er trekt frå konto til fordel for konto nemnd i § 5 andre ledd.

### **§7. Vilkår**

Løyve nemnd i § 6 bokstav a) får følgjande vilkår, dersom fylkeskommunen gjer positivt vedtak etter § 8 andre ledd:

- a) Det skal heile tida vere færre enn 0,1 vaksne holus av lakselus (*Lepeophtheirus salmonis*) i gjennomsnitt per fisk.
- b) Forskrift 5. desember 2012 nr. 1140 om bekjempelse av lakselus i akvakulturanlegg gjeld, med unnatak for § 6 andre ledd siste punktum, då teljing av lakselus skal gjennomførast i samsvar med vedlegg 1 til denne forskrifta.
- c) Grensa i bokstav a skal haldast ved bruk av maksimalt 2 medikamentelle behandlingar mot lakselus per produksjonssyklus.

Krava i bokstavane a) til c) gjeld på alle lokalitetar som er knytt til løyve som har fått auka MTB etter denne forskrifta. Grensa gjeld fram til lokaliteten blir lagd brakk etter avslutta produksjonssyklus, sjølv om løyve som har fått auka MTB etter denne forskrifta ikkje lenger er knytt til lokaliteten.

### **§ 8. Vedtak og tilsyn**

Fylkeskommunen i det fylket løyvet høyrer heime skal behandle meldinga og gjere vedtak. Fiskeridirektoratet er klageinstans.

Fylkeskommunen skal gjere positivt vedtak dersom søkjaren oppfyller krava i § 4, § 5 og § 6. Innehavaren gir beskjed til fylkeskommunen der løyvet høyrer heime 2 veker før han ønskjer at utvidinga av løyvet skal takast i bruk.

Melding som blir levert for seint, blir ikkje behandla.

Dersom det ikkje er lagt ved kvittering som nemnd i § 6 første ledd bokstav b, skal fylkeskommunen be Fiskeridirektoratet kontrollere om vederlaget likevel er innbetalt og bokført innan fristen i § 6 første ledd. Dersom det ikkje er lagt ved kvittering eller vederlaget ikkje er bokført på Fiskeridirektoratet sin konto innan fristen, blir meldinga ikkje behandla.

Dersom meldinga har eventuelle andre feil eller manglar, set fylkeskommunen ein rimeleg frist for oppretting.

Det kan klagast til Fiskeridirektoratet på vedtak. Dersom vedtaket blir halde oppe etter at saka er endeleg avgjort i forvaltninga, skal eventuelt innbetalt vederlag refunderast.

Mattilsynet fører tilsyn med vilkåra etter § 7. Fiskeridirektoratet fører elles naudsynt tilsyn.

### **§ 9. Tilbaketrekking**

Ved fire eller fleire brot på vilkåra i § 7 over ein periode på to produksjonssyklusar blir kapasitetsauken trekt tilbake av Fiskeridirektoratet. Dette gjeld uavhengig av kor mange lokalitetar brota har skjedd på. Vederlag som er innbetalt etter denne forskrifta vil ikkje bli refundert, jf. også § 5 siste ledd.

#### **§10. Reaksjonar og sanksjonar**

Brot på vilkår etter § 7 kan bli møtt med reaksjonar og sanksjonar etter lov 17. juni 2005 nr. 79 om akvakultur.

#### **§ 11. Søksmålsfrist**

Fiskeridirektoratet kan setje som vilkår at mogleg søksmål om forvaltningsvedtak gjort etter at denne forskrifta er gyldig skal takast ut innan 6 månader frå det tidspunkt melding om fastsetjinga av frist kom fram til vedkomande part. Departementet kan gi oppreising mot oversitjing av fristen.

#### **§ 12. Ikraftsetjing**

Denne forskrifta tek til å gjelde straks.

## **Vedlegg 1. Krav til rutinar for teljing av lakselus**

1. Det skal teljast lakselus i følgjande tre stadiegrupper:
  - a) vaksen holus,
  - b) bevegelege stadium, og
  - c) fastsitjande stadium.
2. I akvakulturanlegg med flerie enn tre merdar skal minst halvparten av merdane undersøkjast kvar gong, og på ein slik måte at ein gjennom to ordinære teljingar får undersøkt alle merdane i akvakulturanlegget. Dersom akvakulturanlegget har tre eller færre merdar, skal alle merdar undersøkjast ved kvar teljing.
3. Det skal teljast lakselus på minst 20 tilfeldige fisk frå alle dei utvalde merdane i akvakulturanlegget ved kvar teljing. Fisken skal fangast inn med orkastnot eller annan metode som sikrar eit representativt utval av fisk. Fisken skal bedøvast før teljinga. Det skal vere maksimalt fem fiskar om gongen i bedøvingskaret.
4. Fisken er tilstrekkeleg bedøvd når han ikkje slår med halen når ein løftar han. Ein og ein fisk skal takast opp og undersøkjast nøye.
5. For kvar fisk skal talet på lakselus i dei ulike stadiegruppene førast inn i skjema som er laga til føremålet. For kvar merd skal følgjande opplysningar også noterast på same skjema: Merdnummer, storleiken på merden (omkrets/side) og djupne (rette vegger), talet på fisk og gjennomsnittsvekta av fisken.
6. For kvar merd skal det reknast ut gjennomsnittet for kvar stadiegruppe ved å leggje saman alle lakselus i gruppa frå all fisk som er undersøkt i merden, delt på talet på undersøkte fisk. For akvakulturanlegget skal gjennomsnittet for kvar stadiegruppe reknast ut ved å leggje saman gjennomsnitta frå kvar merd delt på talet på merdar.
7. Før behandling mot lakselus som berre omfattar enkelte produksjonseiningar, skal det vere gjennomført lakselusteljing i alle produksjonseiningar i akvakulturanlegget.

## **Merknad til § 9**

### **Brot**

Første gongs brot

### **Reaksjon**

Tvangsmulkt frå fristen for å rette opp og til tilhøvet er retta. Dersom vilkåra er til stades kan lovbrotsgebyr vurderast. Det bør berre nyttast for meir alvorlege brot.

Dersom det ikkje let seg gjere å bringe nivået av lakselus under grensa, kan Mattilsynet bestemme utslakting.

### **Storleiken på reaksjonen**

Forskrift 5. desember 2012 nr. 1140 om bekjempelse av lakselus gir reglar om tvangsmulkt. Dersom verksemdene let vere å etterleve enkeltvedtak innan fastsett frist, kan Mattilsynet for kvar påbyrja 10 000 fisk i akvakulturanlegget fastsetje løpande dagmulkt til grunnbeløpet i folketrygda dividert med 36,5. For brot på vilkår i løyve kan også lovbrotsgebyr etter akvakulturlova nyttast. Maksgrensa for gebyr er 15 G, men bør her ikkje overstige 5 G.

Andre gongs brot

Tvangsmulkt. Lovbrotsgebyr dersom vilkåra er til stades.

Tvangsmulkt, sjå ovanfor. Opp til 15 G i lovbrotsgebyr, bør ikkje overstige 10 G.

Tredje gongs brot

Tvangsmulkt til tilhøvet er retta. Lovbrotsgebyr dersom vilkåra er til stades.

Lovbrotsgebyr opp til 15 G og inndraging av forteneste knytt til kapasitetsauken på 5 pst. Dette vil kunne utgjere 5 pst. av netto overskot til selskapet.

Fjerde gongs brot

Tilbaketrekking av kapasitetsauken på 5 pst. Vederlaget blir ikkje betalt tilbake.

Tilbaketrekkinga skjer på dei løyva med auka MTB som var knytt til dei lokalitetane der brota har skjedd.